

## Ekwo-ozì, Jiemusu Deru

<sup>1</sup> Mụbe Jiemusu, onye bụ onye-ozì Chileke; bụrụ onye-ozì Nnajiuphu, bụ Jizọsu Kéreshi l'ekele ọkpa-ipfu iri l'ẹbo ono, dzuru mgboko ono ekele.

### *Ekweta waa mmamiphe*

<sup>2</sup> Ụnwunna mu; teke iphe-ọhutama g'ọ dụhabe byaru unu; unu wojeru iya dobe l'iphe, eeteru ẹswa. <sup>3</sup> Kele unu maru l'a -nọdu adale ekweta unu be unu e-shi iya nwuta ọta-nshi. <sup>4</sup> Unu takpọepho nshi tafu iya l'ishi g'unu a-dụebe ree; dzukwaphọ oke g'ọ tọ dọ iphe, a-phọdu l'ẹhu unu. <sup>5</sup> Teke ọ duru g'unu ha onye mmamiphe phoduru; g'onye ono sụ Chileke g'ọ nụ iya mmamiphe. Ọo-nụ iya ya; eshinu Chileke bụ omeluko; teme ọ nọdu egudeje obu iphóró nụ onyemonye iphe, ọ sụru g'ọ nụ iya. <sup>6</sup> Ọle g'onye ono kwetakwa l'iphe oopfu ọ Chileke nụ iya be ọo-nụ iya. G'ọ bọ bọkwa obu ẹbo; l'onye obu abọ ẹbo dükwa g'akpara-mini eze-enyimu, bụ pherephere anọduje enwunga iya. Ọ -kwaru iya shia ọphuu; ọ kwaru iya shia ọphuu. <sup>7</sup> G'egube onye ono ta ariekwa l'ọ duru iphe, ọo-nata l'ẹka Nnajiuphu; <sup>8</sup> kele onye abọ egomunggo ẹbo ta apfushijekwa ike l'iphemiphe, oomekpọo ememe.

### *Ụkpa waa enweru iphe*

<sup>9</sup> Ge nwanna, daru ukpa tua onwiya epha le Chileke kuliru iya eli. <sup>10</sup> Nokwapho g'onye ophu nweru iphe e-tu onwiya epha l'anya lwaru iya; kele oo-mechaa rifu g'okoko eswa; <sup>11</sup> kele enyanwu awaje chishiahaa ike k'ophu oomeje eswa anwua lwa; okoko iya erishihu; mma iya abvu. Noo g'onye nweru iphe a-gbabuhukwapho nwuhu l'eka oome iphe, du iya mkpa.

*Ahuta ama waa enwu eye*

<sup>12</sup> Ehu-utso be a goru nu onye taru nshi l'ohutama; kele teke a hucharu iya ama obu; ophu o daduru be ee-kpube iya okpu-eze, bu iya bu ndzu; buru obunggo, Chileke suru le ya e-bu ndu yeru iya obu. <sup>13</sup> Oo ya bu; onye aahu ama g'o mee ejo-iphe; o -wata iya agugu; g'o to sukwa l'oo Chileke enwu iya eye g'o mee ya. Kele o to dukwa onye Chileke enwu eye g'o mee ejo-iphe; ophu o dukwa onye enwu Chileke eye g'o mee ejo-iphe. <sup>14</sup> Oo eme ejo-iphe, agu nemadzu be edetaje iya nu; l'o nmalahu iya. <sup>15</sup> Oo ya bu; teke egu ejo-iphe tsutaru ime; l'oonwua iphe-eji; iphe-eji kagheepho; l'oonwua anwuhu.

<sup>16</sup> Unwunna mu, mu yeru obu; unu te et-soswekwa uzo. <sup>17</sup> Iphe, aanu anunu, du ree waa iphe-oma, adudu eka ntucha du iya shikota l'imigwe. O shi l'eka Nna ke iphoro imigwe, bu iya bu Nna ophu te echibuhujedu g'enyanwu abujeru o -chibuhu; ochi agbaahaa-a. <sup>18</sup> O turu obu iya onyo gude okpobe-opfu ono nwua anyi; g'anyi du g'akpuru iphe-mbu l'iphemiphe, o meru ememe.

*Anuma emee*

19 Ụnwunna mu, mu yeru obu; iphe, unu a-maru bụ ọwa-a: g'onnyemonye bụkwaru onye angabeje nchị l'iphe, eepfu ọmanu ooyee ya ọnu; bụru onye ẹhu te eghujedu eghu ẹgwegwa; 20 kele iphe, eeme l'ẹhu-eghu taa bụkwaru iphe, pfuru ọto l'iphu Chileke. 21 Ọo ya bụ; unu ọfufu onwunu iphe, bụkpoo umere, l'eshi ishi; waa iphe, bụkpoo iphe-ashi; jia obu oyi; nata opfu ono, a kuru l'ime ọkpoma unu ono, bụ iya l'a-dụ ike dzọ unu ono.

22 Ọle-a; unu bụkwaru ndu eme opfu ono ememe. Unu ta abụkwaru ndu anụ iya anụnu kpurumu; kele ono bụkwa eme onwunu eswe. 23 Onye anụepfo opfu ono anụnu; ọfufu oomedu iya ememe yeru nwoke, ele g'iphu gbaru iya l'onyo. 24 Mbụ onye lechaekwadurupho ọnya l'onyo bya atugbuwa bya azọhaehukwapho g'iphu gbaru iya. 25 Obenu onye enyoje ekemu ono, adudu ẹka ntucha dụ iya; mbụ ekemu, emeje g'e nweru onwonye ono; ọ -duru onye phuberu iya iphu; ọfufu ọ bụdu ọnuma-ọzohaa; ọ -buru onye emeje iya ememe; onye ono bẹ ee-gude iphe, oome meeru eze-iphe-oma.

26 Onye dobesu ọ ya bụ onye ke Chileke l'ẹbe abụ l'ooosedje ire iya eme onwiya eswe. Onye ono bẹ eme ke Chileke nkiya bụ ke mmanu. 27 Abụ onye ke Chileke ọfufu Chileke, bụ Nna kweru l'ọ bụ ọkpobe iya bya aburu ọfufu ntucha adudu ono bẹ bụ akwọ unwogbee ọ mkpa, duru pẹ nụ; waa eyeru unwanyi, ji pẹ anọhedu ẹka; waa ewofu ẹka ọ mkparwụ ke mgboko-a.

## 2

### *Anma okwa abo nemadzu ebo*

<sup>1</sup> Unwunna mu; g'unube ndu kweru ke Nnajiuphu anyi, bu Jizosu Kereshi-a; mbu Nnaji akpabiri; unu ta abojekwa nemadzu ebo.

<sup>2</sup> Kele-a; o -buru l'onye nweru iphe gbacharu mgbuguru bya akwaa onwiya yegele bataru l'ulo-ndzukọ unu; onye ukpa -yee nwankiriba iphe batakwapho; <sup>3</sup> teke unu kwaberu onye pho, kwaru akwapho ubvu su iya: "Bya asugabe onwongu l'okposhi-echi-a" bya asu onye ukpa pho: "Pfuru l'eka ono" ozoo: "Bya anodu l'ali l'eka-a no-kube mu"; <sup>4</sup> ?to budu nemadzu be unu abo ebo egube ono; teme unu gude ejo egomunggo ekpe ikpe?

<sup>5</sup> Unu ngabekpodapho nchi; unwunna mu, mu yeru obu. ?To budu ndu ukpa le mgboko-a be Chileke hotaru g'ephe buru ndu shi l'ekweta, ephe kwetaru nweru iphe l'iphu Chileke; bukwarupho ndu e-nweru eka o bu eze, bu iphe, o suru le ya a-nu ndu yeru iya obu-a.

<sup>6</sup> Unu gbenu meru iphe-iphere kpua ndu ukpa ?Tobudu ndu nweru iphe be l'akpaje unu ehua? ?To budu phe be l'akpujeru unu je edobe l'ulo ndu-ikpe-a? <sup>7</sup> ?Tobudu phe anoduje epfubiyi eguru epha ono, unu aza ono epfubiyi-a?

<sup>8</sup> Unu -nodu emewaa eze ekemu ono be unu emewaa ree, bu iya bu eze ekemu, no l'ekwo Opfu Chileke, suru: "G'i yee nemadzu ibe ngu obu g'i yeru onwongu." <sup>9</sup> Obenu le-a; unu -nodu aboje nemadzu ebo be unu emekwa iphe-eji; teme ekemu nodu anmakwapho unu

ikpe, bu iphe, gbaru onye emebyi ekemu. <sup>10</sup> Kele onye meeḅekotaru iphe, ekemu pfuru g'ọ ha; mephodo nanu ḅe ikpe nmakwaru l'o mebyikotaru iya g'ọ ha. <sup>11</sup> Kele ọ bukwapho onye suru g'i ti rishi ogori suru g'i ti gbushi ochi. Ọ -buru l'i ti ridu ogori; i nodu egbu ochi; i buakwaa onye emebyi ekemu. <sup>12</sup> Ọo ya bu; unu pfuje; teme unu emejekwapho ge ndu ee-gude ekemu ono, emeje g'e nweru onwonye ono kpee ikpe. <sup>13</sup> Kele onye ta aphuduru onye ozo obu-imemini be a taa phukwarupho obu-imemini me e -kpeje ikpe. Obu-imemini atujeru okoo kpua ikpe!

### *Ekweta yele iphe, eeme ememe*

<sup>14</sup> Unwunna mu; ?denu urwu, du le nemadzu suru le ya nweru ekweta; ophu oogoshidu iya l'umere? Egube ekweta ono ?oo-du ike dzoo ya? <sup>15</sup> Teke o bu l'o duru nwanna ke nwoke; ozo ke nwanyi, gbagbuwa oto; teme ophu o humajedu nri ria; <sup>16</sup> onye lanu g'unu ha su iya: "Tokwa eh-u-o! Laa je anyaru oku; g'epho ji ngu" l'ebe abu l'o nuru iya iphe, bu mkpa eh-u iya; ?denu urwu, du l'egube iphe ono? <sup>17</sup> Noo g'ekweta kpoloko e te goshiduru l'iphe, eeme ememe bu iphe, nwuhuru anwuhu.

<sup>18</sup> Obenu l'a su mu: "Gubedua nweru ekweta; mbedua nodu ejekwanu ozi." O du ree; goshiekwa mu ekweta ngu me ii -jedu ozi, du iya nu. Mbedua-a egudekwanu ozi, mu eje goshi ngu ekweta mu. <sup>19</sup> I kweru le Chileke bu Chileke lanu; i meru ree. Ono bukwapho g'obvu kwegbaaruu gude iya anmagbaa pyaapyaapya.

<sup>20</sup> Olee iphe, ìi-maru gùbe onye mmanụ onobụ l'ekweta, eegoshiduru l'iphe, eme ememe ta abụdu ọkpobe iya. <sup>21</sup> ?Denu g'onye-iche anyi, bụ Ébirihamu gude buru onye pfulerekoto l'iphu Chileke? O shi l'iphe, o meru; kelee o gude Áyizaku, bụ nwa iya je egbugbu ge ya gude gweeru Chileke ngweja l'oru-ngweja. <sup>22</sup> ?Tị humaduru g'ekweta iya yee iphe, o meru dagbaru? Iphe, o meru goshiru l'ekweta iya dzuru edzuzu. <sup>23</sup> Iphe, e deru l'ekwo-opfu Chileke mee g'e pfuru iya; kelee o suru: "Ébirihamu kweru ke Chileke; o guaru iya ya l'apfulerekoto"; teme o gua ya eguru onya iya. <sup>24</sup> Unu huma l'oo iphe, nemadzu eme be e gude agu iya l'onye pfulerekoto; o to budo-a ekweta kpurumu.

<sup>25</sup> Nokwapho ge nwanyi ovuoba-a, bu Rehabu-a du. Oo iphe, o meru be o gude buru onye pfulerekoto; kelee o kweru ge ndu Jiu, e ziru ozi bata ibe iya; bya eyeru phe aka; ephe shia uzo ozo laa.

<sup>26</sup> Kelee oo g'anu-ehu, unme adudu nwuhuru anwuhu-a bu g'ekweta, eegoshiduru l'iphe, eme ememe nwuhuru.

### 3

#### *Ire bu ogu*

<sup>1</sup> Unwunna mu; unu ta adukwa igwe buru ndu ezije iphe; kelee unu maru l'anyiibe ndu ezije iphe be Chileke a-ka ekpeshi ikpe ike. <sup>2</sup> G'anyi ha etsosweje iphe, du igwerigwe. O kwa onye opfu teke edeswe bu onye duebe ree. O buru egube onye ono adujekwapho ike sede onwiya.

<sup>3</sup> Anyi -woru mkpurukpu-ìgwè-ìnya kobe ìnya l'ònu g'o meje iphe, anyi sùru g'o mee bẹ anyi emeje ìnya l'ophu; l'ooshi ẹka anyi sùru g'o shia.

<sup>4</sup> Ozokwapho ugbo-mini; ?Ì hùmaru g'ò habe shii; tẹme ọ buru oke pherephere anọduje akpọ iya; ọle ọo nwa gberere eku ugbo bẹ eegudeje anga iya l'ooshi iphe, bukpoọ ẹka onye-ishi ugbo anga iya eshi. <sup>5</sup> Nokwaphọ g'ire bu nwiphe nshii; ọle ootuje onwiya ẹpha lẹ ya erenuka ire.

?Tì hùmaduru g'oswa habe shii? ọle akpuru ọku lanu etsuje obote-egu. <sup>6</sup> Sù-a; ire bu akpuru ọku. Ire nọ-chiru ẹnya iphe, bukpoọ ejo-iphe, nọ lẹ mgboko-a l'ẹhu anyi. Ire efpurwuje ogwehu nemadzụ mgburugburu; tẹme ọ nọdu alọtaje ọku-alì-maa tsobe lẹ ndzụ nemadzụ; l'ootsua ya tsufu; ooshiẹpho teke a nwuru onye ono; tsua jasụ g'ọo-nọ-beru. <sup>7</sup> Ọ tọ dudu egube anu-egbudu; ọzoo ẹnu; ọzoo iphe, akpụ akpukpu; ọzoo iphe, bu lẹ mini, nemadzụ ata agọtajedu agota; l'ooburu l'unuphu; ọphu ọ dudu ọphu a gọtadaru; o buru l'unuphu. <sup>8</sup> Obenu l'ire ta adudu amadu sùru iya agota; ọ bu ejo-iphe, e te gudeshijedu egudeshi. Ọ dọ g'ẹrú ejo agwo, te edodu onye ọ taru edodo. <sup>9</sup> Ọ bu iya bẹ anyi gude aja onye ono, bu Nna bya buru Nnajiuphu ono; ọle ọ buhukwa iya phọ bẹ anyi gude atụ nwibe anyi onu; mbukwa onye e meru; ọ dọ gẹ Chileke. <sup>10</sup> Ọ buru onu lanu ono bẹ agọ onu yẹ atụ onu shi. Unwunna mu; ọ tọ gbaduru g'ọ dọ egube ono. <sup>11</sup> Ọ tọ dudu nggele, asofutaje mini, atso ilu bya asofutajekwapho mini, atso utso mgbo lanu. <sup>12</sup> Unwunna mu! Oshi figu ta amijekwa akpuru olivu. Ọphu vayinu amijekwa akpuru

figu. Nokwapho g'e te ekutadu mini, atso uto l'umaswi.

### *Mmamiphe, shi l'igwe*

<sup>13</sup> ?O duru onye ari le ya maru iphe; nweru uche g'unu ha? Onye ono goshieshikwa iya l'eme umere oma; waa l'eme gelee ophu shi le mmamiphe. <sup>14</sup> Teke o bukwanu l'unu eji iji-enya, atso-ilu bya aburu ndu akpa enya; unu te ejekwa etu onwunu epha ke mmamiphe ono; kele o o uka be unu gude emebyi okpobe-opfu. <sup>15</sup> Egube mmamiphe ono te eshikwa l'igwe. O shi l'eka ndiphe. O to shidu l'eka Unme Chileke. O shi l'eka Nsetanu. <sup>16</sup> Kele eka iji-enya yee akpa enya du be mkpaka dukwapho; ophu o dudu egube ejo-iphe, adudu iya nu. <sup>17</sup> Obenu le mmamiphe ophu shi l'igwe duebe ree; bya aburu nchi-adu-doo; bya eme gelee; bya eme onu-uto; bya aphu obu-imemini; bya ami okpobe mebyi; ophu okpochadu mkpocha; ophu o budu toko l'ehu-atuko-l'obu. <sup>18</sup> Teme mebyi, ndu eme ge nchi du doo amije bu apfubekoto.

## 4

### *Eshita ndiphe onya*

<sup>1</sup> ?Bu awe be abaphe mba yee esephe opfu ono shigbaa unu? ?Tobudu eka o shigbaa unu bu l'iphe, ekpiri iya du unu? ?Tobudu iya bu iphe, bu ogo, du l'ehu unu? <sup>2</sup> Obujeru iphe, agu unu erwuduru unu eka; unu egude k'iphe ono gbuharu ochi. Unu -chabe enya l'iphe onye ozo; ophu o dudu; unu abaahaa mba; seahaa opfu. Unu ta ahumaduru uzo iphe, agu unu;

kele unu ta asuduru g'a nū iya unu. <sup>3</sup> Unu nōdu asuje g'a nū unu iphe; a ta nūdu iya unu; opfu l'unu egudeje ọriri, adudu ree epfu iya g'ee-shi g'unu egude iya mee iphe, agu unu ẹgu. <sup>4</sup> Unube ẖnwanyi me unwoke, eri ogori ono; ?unu ta amadu l'onye yee iphe-utso, du le mgboko-a eshi ọnyà buwaa onye ọhogu Chileke? Oo ya bu l'ọ tọ dudu m'obeta ọ buru onye du idagha hataru g'ephe le ndiphe shiru ọnyà; onye ono emekwa onwiya onye ọhogu Chileke. <sup>5</sup> Tọ ?ọ du unu g'iphe, e deru l'ekwo-opfu Chileke bu ke mmanu, suru le "Chileke eko okophoo unme ono, o yeru g'ọ buru l'ime anyi ono?" <sup>6</sup> Ọle eze-ipe-oma ke Chileke ka shii. Noo iphe, e deru l'ekwo-opfu Chileke su: "Chileke apfuchijekwa ndu ngganga ọzo. Ọ nōdu emejeru eze-ipe-oma nū ndu wozeru onwophe ali."

<sup>7</sup> Oo ya bu; unu nōdu Chileke l'eka. Unu apfu-chia Obutuswe ọzo; hūma l'ọo-gbaru unu ọso. <sup>8</sup> Unu kpitaru Chileke ntse; hūma l'ọo-kpitarakwarupho unu ntse. Unu kwọo onwunu eka unube ndu eme iphe-aji. Unu sachaa obu unu ree unube ndu abo obu ebo. <sup>9</sup> G'ọ rwua unu l'ehu; g'aphu ji unu obu; unu kwashia enya-mini. G'achi ọchi buru unu aphu; g'emere me buru unu iphere. <sup>10</sup> Unu wozeje onwunu ali l'iphu Chileke g'ookulia unu eli.

### *Anma ọkwa epfurwushi nwanna onye*

<sup>11</sup> ẖnwunna mu; unu te epfurwushijekwa nwibe unu. Onye epfurwushi nwanna iya; ọzoo onye anma nwanna iya ikpe be epfubiyikwa ekemu; teme ọ buru ekemu be ọ gbẹ ekpe

ikpe. Obenu lẹ teke iikpe ekemu ikpe bẹ i ti meekwa iphe, ekemu pfuru. Ọ kwa onye-ikpe bẹ ị bụ. <sup>12</sup> Onye lanụ kpurumu bụ onye atuje ekemu; teme ọ bụru iya bụ onye-ikpe; mbụ onye ono, aduje ike dzoo ndzụ; dukwapho ike gbua nemadzụ. Obenu ?bụ onye b'i dobesu l'ị bụ gube onye ono, anma nwibe ngu ikpe?

### *Anma okwa etu onwonye epha*

<sup>13</sup> Unu ngaberu mu nchi; unube ndu suru “Ntanu-a; ozoo echele bẹ ọ duru mkpukpu, anyi e-je je anogba apha; gbaa ngho rita urwu;” <sup>14</sup> l'ebe abụ l'unu maru g'echele a-du. ?Ndzụ unu bụ gūnu? Ọ bụ enwuru-oku, akpu-lihuje; a noekwapho nwanshii l'oophukashihu. <sup>15</sup> Noo iphe, unu gege asuje chia: “Ọ -du Chileke l'uche bẹ anyi a-tuko nodu ndzụ; mee owa-a; ozoo ophuu.” <sup>16</sup> Obe l'owa bẹ unu etse etsetse bya etu onwunu epha. Egube ekuku ono g'ọ hakota dukwa eji.

<sup>17</sup> Ọo ya bụ l'onye maru ree, o gege eme; ophu o meduru iya bẹ ọ bukwa onye obu eme iphe-eji.

## 5

### *Anmaru ndu nweru iphe okwa*

<sup>1</sup> Nta-a bụ k'unube ndu nweru iphe; unu kwashia enya-mini; chia mkpu ejo-aphu, ab-yaru unu. <sup>2</sup> Eku unu reshichuakwaru ereshihu. Teme ngwa unu buri iphe, nsu sukashichawaru. <sup>3</sup> Mkpola-ododo unu me ke mkpola-ochaa unu gbaakwaru egba. Ọo egba iya ono a-pfuru agba unu ekebe. Oo-kepyashi anu-ehu unu g'oku. Nta-a bẹ unu kparu eku

kūberu onwunu l'ikpazu-a. <sup>4</sup> Ndu jeru unu ozi ẹgu bẹ unu ta apfuduru ụgwo; aphụ, ẹphe agụ bẹ erwuakwa l'igwe. Teme mkpu kẹ ndu kpatarụ unu iphe, unu kọru l'opfu rwuakwaphọ nchị Chipfu, bụ Okalibe-Kakọta-ike ono. <sup>5</sup> Unu buru lẹ mgboko; tūsarụ ẹhu; eri gwogwo; eme ẹhu unu ẹhu unu. Unu tsua onwunu ẹbà g'anụ-ẹbà kwaberu mbọku egbugbu unu. <sup>6</sup> Unu nmarụ ndu pfuberekoto ikpe; gbua phẹ; l'ẹbe abụ l'ọ dūru iphe, ẹphe akpohijehawaa unu ememe.

*Ata nshi waa epfu anụ Chileke*

<sup>7</sup> Ụnwunna mu; unu takpọekwapho nshi nọdu jasụ teke Nnajiuphu a-bya. Unu hūmaru g'onye kọru opfu atajẹ nshi; kwaberu opfu iya g'o rwuta iphe, barụ urwu. Ọotaje nshi; igwe eshi l'awuze dzee mini dzekọta iya udzumini; l'ootaa nshi jasụ l'ephefuta. <sup>8</sup> Unubedua kwaphọ; unu takwaphọ nshi; shihu obu ike; kele teke Nnajiuphu a-bya dūakwaa ntse.

<sup>9</sup> Ụnwunna mu; unu ta agujekwaru nwibe unu aphụ g'eete ekpedu unu ikpe. Unu lekwa onye-ikpe g'ọopfuru l'ọnu mgbo! <sup>10</sup> Ụnwunna mu; unu nyatajẹkpoepfo ndu shi epfuchijeru Nnajiuphu. Unu gudeje phẹ nwua ọta-nshi teke unu eje iphe-ẹhuka. <sup>11</sup> Unu eleanaa; ọ kwa ndu tarụ nshi bẹ anyi ekuje ndu a goru ẹhu-utso nū. Unu nūmawaru atanshi kẹ Jiobu. Unu makwaruphọ iphe, Nnajiuphu nūru iya l'ikpazu. Kele Nnajiuphu bụ onye obu-imemini bya aburu ọ-gba-mkpu.

<sup>12</sup> Ọle ọphu kachakpọonu; ụnwunna mu bụ; unu te erijekwa angụ. Unu te egudejekwa igwe

ozoo alì ria angù; òphu ò dükwa iphe òzo unu e-gudeje ria angù. Unu -sù “ee” g'ò buru ee; teke unu sùru “waawaa” g'ò buru waawaa; g'a ta anma unu ikpe iya.

<sup>13</sup> ?Ò duru g'unu ha onye eje iphe-èhuka? G'onye ono pfuru nù Chileke. ?Ò duru onye èhu atso? G'onye ono gùa ebvu ajaja! <sup>14</sup> ?Ò duru g'unu ha onye iphe eme? G'onye ono kukòo ndu e meru ògerenya Chìochi g'èphe pfuru opfu èhu iya nù Chileke. Èphe egude èpha Nnajiuphu wù ya manù l'ishi. <sup>15</sup> Opfu, e pfuru nù Chileke bya ekweta l'oo-mee bè a-dzòta onye iphe eme; Nnajiuphu abya emee; l'o wekòrohu. Teke ò bù l'òo iphe-èji bè o meru; a gùaru iya ya nvù. <sup>16</sup> Noo ya bù; unu kòshijeru nwibe unu iphe-èji unu; tème unu epfukwaphò anùru nwibe unu Chileke g'ee-me g'unu wekòrohu. Opfu, onye pfberekoto pfuru nù Chileke bè ike dükwa l'ere ire.

<sup>17</sup> Elayijia bù nemadzu mmanù g'anyi bù. O pfuru nù Chileke pfushia ya ike sù g'igwe buchia mini. Ò nò mgbarapha èto l'onwa ishii; òphu mini atadaduru l'alì. <sup>18</sup> Ò bya epfuru nù Chileke òzo; igwe bya mini. Iphe, a kuru l'alì mìaahaa mebyì òzo.

<sup>19</sup> Ünwunna mu; ò -duru g'unu ha onye shisweru uzo l'òkpobe-opfu ono; onye òzo duphuta iya azù l'ùzo, pfuru òto; <sup>20</sup> g'onye ono maru l'onye duphutaru onye eme iphe-èji azù; mbù onye l'eshì uzo, gberu nggò; onye ono bè dzòtaru nemadzu l'èka onwu; tème o meakwaruphò; a gùaru iya nvù l'ikpoto iphe-èji.

**Bayiburu Izii**  
**Izii: Bayiburu Izii Bible**

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

c6885c7c-c550-5b8b-a4fe-4bd714af4f6d